



Služba za društvene djelatnosti i poslove mjesnih zajednica

Broj: 07-sl./21  
Ilijaš, 15.02.2021.godine

STRUČNA SLUŽBA OPĆINSKOG VIJEĆA I  
OPĆINSKOG NAČELNIKA

**ODGOVORI NA VIJEĆNIČKA PITANJA I INICIJATIVE  
SA 2. SJEDNICE OPĆINSKOG VIJEĆA ILIJAŠ  
održane 04.02.2021.godine**

Ilijaš, februar 2021.godine

\*\*\*\*\*

Ul. 126. Ilijaške brigade br. 6, 71380 Ilijaš  
Tel. ++387 33 580-620, 580-690, fax. 400-505,  
Transakcijski račun kod VAKUFSKE BANKE, d.d. Sarajevo: 1602000000710645  
e-mail [drustvenedjelatnosti@ilijas.ba](mailto:drustvenedjelatnosti@ilijas.ba)



Broj certifikata: CRO20063Q

## **DENIS DILBEROVIĆ – vijećnik SDA**

Inicijativa:

4. Pokrećem inicijativu prema RTV BiH da obezbijedi TV prijem/signal na području Mjesne zajednice Gajevi.

Obrazloženje: Građani Mjesnih zajednica Dragoradi i Gajevi su se obratili ovom inicijativom i mole nadležne službe da riješe navedeni problem i pitaju kako je moguće da je RTV BiH duži niz godina naplaćivala uslugu koju nije ni pružala.

**Odgovor:** Inicijativa je upućena Radioteleviziji Bosne i Hercegovine (BHRT-u.)

Po prijemu odgovora, isti će biti prezentiran Općinskom vijeću Ilijaš.

## **KENAN HASIĆ – vijećnik SDA**

Inicijativa:

1. Ispred Kluba vijećnika OO SDA Ilijaš i u svoje lično ime, pokrećem inicijativu da se uvede nova autobusna linija koja bi saobraćala na relaciji Kadarići-Ilijaš. Inicijativu pokrećem nakon konsultacija sa građanima Kadarića, te nakon uvida u trenutnu situaciju.

Obrazloženje: Nakon razgovora sa građanima i prikupljanja podataka, uvidio sam da se javila potreba za uvođenjem nove autobusne linije, iz naselja Kadarići trenutno u OŠ "Hašim Spahić" Ilijaš idu 52 učenika. Time zaključujemo da ima veći broj od potrebnog kako si se uvela nova linija. Djeca prilikom dolaska i vraćanja iz škole moraju da pređu most, prugu i magistralnu cestu sa tri trake, a postojeći semafor i pješački prelaz nisu u 100% funkciji. Kadarići su veliko naselje, tako da bi se obezbijedila 2 ili 3 mjesta za čekanje autobusa (stajališta).

**Odgovor:**

Članom 64. Zakona o osnovnom odgoju i obrazovanju Kantona Sarajevo ("Službene novine Kantona Sarajevo" broj:23/17, 33/17, 30/19 i 34/20), definisano je osiguranje besplatnog prijevoza za redovne učenike javnih ustanova osnovnih škola, ako pohađaju školu u školskom području sa područja Općine, a koji stanuju na udaljenosti većoj od dva kilometra od škole koju pohađaju i gdje nemaju uspostavljene redovne linije za područje Kantona Sarajevo, prijevoza učenika i pratioca koji pohađaju Centre iz člana 67. Zakona o osnovnom odgoju i obrazovanju Kantona Sarajevo, koji nemaju posebno organizovan prijevoz za učenike, te besplatan prijevoz redovnih učenika javnih ustanova srednjih škola (prvih i drugih razreda) i subvencioniranje troškova prijevoza redovnih učenika javnih ustanova srednjih škola (treći i četvrti razred), gdje nemaju uspostavljene redovne linije za područje Kantona Sarajevo što je definisano Zakonom o srednjem obrazovanju ("Službene novine Kantona Sarajevo", broj: 23/17 i 30/19).

Do sada nije postojao organizovan prijevoz učenika iz naseljenog mjesta Kadarići jer preko 95% učenika stanuje na udaljenosti manjoj od 2km od JU OŠ "Hašim Spahić" i SŠC "Nedžad Ibrišimović" Ilijaš.

Opravdanost uvođenja ove linije postoji prije svega zbog bezbjedonosnih razloga navedenih u obrazloženju inicijative ( prelazak mosta, pruge i regionalne ceste sa tri trake), ali i u slučaju njenog uvođenja, potrebno je naglasiti da bi svega 5% učenika moglo ostvariti povlasticu za prijevoz, a za 95% učenika prijevoz bi bio organizovan na komercijalnoj osnovi kupovinom mjesečne karte, čime bi interes roditelja za korištenje ove vrste prijevoza vjerovatno bio smanjen, a samim tim i zainteresovanost prijevoznika za obavljanje prijevoza na ovoj liniji, obzirom na male finansijske efekte.

## ALMIR ŠPIODIĆ – vijećnik NIP-a

### Inicijativa:

Na osnovu Statuta Općine Ilijaš ("Službene novine Kantona Sarajevo", br.20/09 i 46/18), člana 25. i 26., grupa vijećnika u skladu sa Statutom podnosi inicijativu:

1. Pokrećemo inicijativu za raspisivanje referenduma za poništavanje postojećih općinskih akata vezanih za mjesne zajednice, raspuštanje trenutnog saziva savjeta mjesnih zajednica, te izrada općinskog propisa i akata za uspostavu demokratskog i zakonitog procesa izbora u savjetima mjesnih zajednica uz reforme mjesnih zajednica sa prilagođenim brojem mjesnih zajednica.

Zakonski okvir:

Zakon o principima lokalne samouprave FBiH i Zakon o lokalnoj samoupravi KS propisuju referendum po istom principu po kojem to propisuje Statut Općine Ilijaš član 25. i to raspisivanje istog u skladu sa članom 26. stav 1. na način da minimalno 1/3 ukupnog broja izabranih vijećnika predloži raspisivanje istog. O inicijativi, Općinsko vijeće Ilijaš, dužno je odlučiti glasanjem uz prethodno provedenu diskusiju.

Obrazloženje: U razgovorima sa stanovništvom sa područja cijele općine i sami smo uvjereni da je građanski model učešća građana u vlasti oslabljen ili nedemokratizovan, te da je zakonski okvir koji definiše izbor savjeta mjesnih zajednica neustavan i nezakonit, jer krši Izborni zakon BiH, Zakone o lokalnoj samoupravi FBiH i Kantona Sarajevo, te Statut Općine Ilijaš. Primjer svemu navedenom je tačka 12. dnevnog reda na današnjoj sjednici, gdje se u obrazloženju kaže da savjet mjesne zajednice predlaže člana savjeta mjesne zajednice prilikom istupanja izabranog člana iz savjeta. Imajući na umu koliko je važno da svi mi ustvari oslikavamo stvarno stanje među stanovništvom općine Ilijaš koje nas je, uostalom, i izabralo da ih parlamentarno zastupamo u Općinskom vijeću Ilijaš, ubjeđenja smo da bi u ovom konkretnom slučaju ne komuniciranje ovog problema i zanemarivanje povratne informacije od samih građana bilo poražavajuće za demokratsko društvo i društvo jednakih šansi koje gradimo i svakodnevno se trudimo popravljati. Sveukupna zakonska i objektivna opravdanost inicijative za izmjene izbornog procesa u savjetima mjesnih zajednica, a imajući na umu kako je ovo pitanje isključivo u nadležnosti onih kojima izmjena modela izbora i funkcionalnost mjesnih zajednica najviše donosi, smatramo obaveznim konsultirati mišljenje većinskog stanovništva općine Ilijaš. Kako su odredbama na osnovu kojih su provedeni posljednji izbori za savjet mjesnih zajednica jasno povrijeđeni gore navedeni zakonski propisi, te je isti izbor učinjen invalidnim, uz raspisivanje referenduskog pitanja, obavezni smo, kao OV-e Ilijaš, izglasati i raspuštanje postojećih savjeta mjesnih zajednica do provođenja novih demokratskih izbora. Referendumsko pitanje treba ponuditi izbor volje građanima u smislu potreba za izmjenom propisa i akata, a koji regulišu izbor savjeta mjesnih zajednica u smislu poništavanja Odluke koja propisuje izbor predsjednika i savjeta zatvorene liste, te poštivanje Zakonskih propisa FBiH i KS, te Statuta Općine Ilijaš član 86. i Izbornog zakona BiH, a sve prema građanskoj inicijativi koja se tiče ovog pitanja sa ove sjednice. Referendumski način je jedinstveni princip, zakonski propisan, koji nam dozvoljava da građani Općine Ilijaš odluče samostalno o ovom pitanju, te da se poštuje princip građanske inkluzije u vlasti, posljedično navedenom grupa vijećnika potpisuje vijećničku inicijativu.

**Odgovor:** U skladu sa članom 27. Statuta Općine Ilijaš ("Službene novine Kantona Sarajevo", br.20/09-prečišćeni tekst i 46/18) Općinsko vijeće je dužno raspraviti o navedenom prijedlogu za raspisivanje referenduma u roku od 60 dana od dana podnošenja prijedloga.

Ako Općinsko vijeće ne prihvati prijedlog za raspisivanje referenduma, dužno je obrazložiti odbijanje prijedloga i obavjestiti predlagača.

2. Pokrećem inicijativu da se hitno izvrši uređenje školskog dvorišta područne škole Ljubnići, a što podrazumjeva izgradnju dječijeg igrališta i terena za održavanje tjelesnog odgoja učenika.

Obrazloženje: Građani Ljubnića u proteklih nekoliko godina ukazuju na potrebu da se uradi igralište i uredi školsko dvorište područne škole Ljubnići, kako bi učenici koji pohađaju osnovnu školu imali prikladne uslove za održavanje tjelesnog odgoja koji dolikuje 21. vijeku. Roditelji djece iz Ljubnića na sastanku Vijeća roditelja OŠ "Podlugovi", načelnika i vijećnika koji je održan 2018. godine u OŠ "Podlugovi" ukazali su načelniku na problem i tražili da se isti riješi u što kraćem roku, što je načelnik i obećao. Međutim, prošle su gotovo tri godine, a ništa se po ovom pitanju nije uradilo. Očekujem da ova inicijativa bude prihvaćena i realizovana u tekućoj godini. S obzirom na to da će uskoro biti i nacrt Budžeta, ova inicijativa će biti, između ostalog, i prijedlog Naroda i Pravde kroz javnu raspravu za nacrt Budžeta.

**Odgovor:** Ova inicijativa pokretana je i ranije, te će ista biti uvrštena u nacrt Budžeta općine Ilijaš za 2021.godinu i Operativni plan rada općinskog načelnika i Službi za upravu općine Ilijaš.

U 2020.godini obezbijeđena su i putem škole realizovana sredstva za uređenje prilaza Područnoj školi Ljubnići u vrijednosti 7.000,00KM. Menadžment JU OŠ Podlugovi je kao prioritet za finansiranje u 2020.godini izdvojio sanaciju mokrih čvorova na spratu centralne škole. Ovaj projekat je realizovan u cjelosti, a vrijednost izvedenih radova iznosila je 22.698,00KM.

Na prijedlog grupe građana, pokrećem slijedeće inicijative prema nadležnim općinskim službama i Kolegiju Općinskog vijeća.

3. Poništavanje Odluke o uslovima, načinu kandidiranja, održavana izbora, dodjeli mandata u mjesnim zajednicama i razrješenju predsjednika i članova savjeta mjesnih zajednica broj: 01/I-02-800-8/19 od 18.04.2019. godine i Odluke o izmjenama i dopunama Odluke o osnivanju mjesnih zajednica na području Općine Ilijaš ("Službene novine KS" broj 17/19).

4. Poništavanje Odluke o potvrđivanju rezultata izbora za predsjednike i članove Savjeta mjesnih zajednica na području Općine Ilijaš i Odluke o konačnim rezultatima izabranih lista članova Savjeta MZ-a Općine Ilijaš.

5. Izrada općinskog propisa ili akta izbornog okvira savjeta mjesnih zajednica i reforma broja mjesnih zajednica prema potrebama stanovništva.

Obrazloženje: U proteklom periodu mnogo vremena sam proveo u posjeti i druženju, pa tako i razgovoru sa građanima iz svih dijelova naše prelijepe općine. Ne mogu, a da odmah ne naglasim da svi dijele jedno identično razmišljanje, poražavajuće i zastrašujuće, a ujedno alarmantno, i to da im je zakonski zagarantovano pravo da budu participant u odlučivanju, oduzeto. Prava građana da učestvuju u odlučivanju i raspravama narušeno je i najbahatije uksraćeno zbog političke klime koja je u najmanju ruku autokratska. Autokratska kažem, bez da želim ikoga vrijeđati, ali moram biti senzibilan i izraziti duboko žaljenje zbog situacije u koju smo dovedeni u 21. vijeku iz ko zna kojih razloga, a smo kao društvo u mnogo čemu podbacili. Ono što je gorući problem naroda jeste politička retorika dobrovolje i blaženstva u vremenu kada ovakvim i sličnim postupcima ne težimo ka jačanju uloge mjesne zajednice u društvu, nego unazađujemo demokratičnost društvenog poretka. Inicijacija je direktno vezana baš za ovo obrazloženje, za građane i njihovu inkluziju. Inicijativu koju iznosim, smatram inicijativom svih građana, a tiče se isključivo

volje naroda za izmjenu odluke kojom se proces izbora savjeta mjesnih zajednica učinio nelegitimnim, neprincipijelnim, a povrh svega i nezakonitim. Tako, kao jedna od rijekih, možda i jedina općina o kojoj smo upoznati, sveli smo mjesne zajednice i njihovo postojanje u koš političkih obračuna, političke hijerarhije i političkog funkcionerstva, a ne za prostor uključivanja građana u procese odlučivanja na nivou JLS. U osnovi, derogirali smo građanski model mjesnih zajednica i izuzeli iste iz modela građanskih, zasigurno ne predstavljaju tijelo iz zakona koje kaže da je mjesna zajednica oblik neposrednog učestvovanja građana u odlučivanju. Mjesne zajednice Općine Ilijaš možda su funkcionalne po željama pojedinca, ali su nereprezentativne.

#### Zakonski okvir:

Zakonski okvir osnivanja mjesnih zajednica početno proističe iz Zakona o principima lokalne samouprave u FBiH član 26. i Zakon o lokalnoj samoupravi KS član 37. stav 1. i 2., a definisan je Zakonom o lokalnoj samoupravi KS član 36. stav 1., a onako kako je do definisano Odlukom o osnivanju mjesnih zajednica Općine Ilijaš, načinu provođenja postupka izbora savjeta mjesnih zajednica, sva pravna formulacija u praksi je obesmislena. Nadalje, Izbor savjeta mjesnih zajednica zatvorenim listama protivpravan je i diskriminirajući sa Izbornim zakonom BiH od ovjere i kandidature prema članu 4.1 čime se sprječava kandidatura pojedinca, ali i u pogledu postojanja koalicija, prestanka mandata, prava građana da budu birani i drugo. Ono najbitnije, kao legalist, moram najoštrije osuditi nepoštivanje i nipodaštavanje hijerarhijski najstarijeg dokumenta lokalne samouprave i to Statuta Općine Ilijaš koji u članu 86. stav 2. jasno definiše da legitimno pravo izbora u savjet imaju kandidati koji dobiju najveći broj važećih glasova birača, a koje se uskraćuje na način da se onemogućava pojedinačno glasanje za kandidate, već za liste koje se ni u jednom dijelu navedene odredbe ne spominju. Također, provođenjem izbornog procesa u mjesnim zajednicama kako je to urađeno na posljednjim mjesnim izborima, grubo se krši i stav 6. istog člana i to na način da je uspostavljen nedemokratski princip popune upražnjenih mjesta u savjetu mjesne zajednice, iz razloga što se oduzelo pravo birača, ali i kandidata za pojedinačno izjašnjavanje o svim kandidatima. Naime, kada neki pojedinac istupi iz savjeta, njegovo mjesto nemoguće je demokratski i pravnovaljano popuniti, jer ne postoji drugi kandidat koji je ostvario bilo kakav izborni rezultat iz razloga što je to pravo uskraćeno svima, pa tako svodimo demokratske procese u ruke pojedinaca ili grupa pojedinaca. Zakonski okvir za provođenje izbora savjeta mjesnih zajednica mora oslikavati zakonodavni okvir Izbornog zakona BiH, proizlaziti iz normativa i propisa FBiH i KS, a biti bazno naslonjen na Statut Općine Ilijaš. Izbor savjeta mjesnih zajednica treba omogućiti kandidaturu pojedinaca i koalicija, iznaći rješenje demokratskog reizbora ili prijevremenog izbora, ali i nadopune savjeta u slučajevima koje zakon tretira. Reforma mora zastupati i interese većine građana, a koji se ogledaju i u vraćanju statusa mjesnih zajednica onim mjesnim zajednicama koje su to imale, ali i uspostava statusa mjesne zajednice onim naseljenim područjima na kojima za to postoji objektivna opravdanost kao što su Kadarići, Han-Popovići, Bioča i Nišići. S obzirom da je trenutni izbor baziran na protivpravnim i neustavnim odlukama Općinskog vijeća, ista je potrebno invalidirati i sve procese proizašle iz istih poništiti.

**Odgovor:** Svi navedeni akti mogu se staviti van snage i u redovnoj proceduri rada Općinskog vijeća Ilijaš i Kolegija Općinskog vijeća, tako da se ne moraju rješavati referendumom.

Svi Zaključci koje donese Kolegij Općinskog vijeća i Općinsko vijeće, a odnose se na ovu tematiku bit će ispoštovani. Služba će pripremiti potrebne akte za sprovođenje donesenih Zaključaka.

## **VERNESA BEŠLIJA – vijećnica NIP-a**

Inicijative:

1. Podnosim inicijativu prema Zavodu za javno zdravstvo Kantona Sarajevo da se postojeći laboratorij u Domu zdravlja Ilijaš osposobi i prilagodi radu na način da se omogućiti da analize nalaza koji se do sada rade u Domu zdravlja Ilidža, rade u Ilijašu.

Obrazloženje: Svjedoci smo da naši sugrađani svakodnevno rade nalaze za koje nije osposobljen postojeći laboratorij u Domu zdravlja Ilijaš, te su zbog istih primorani da idu u Dom zdravlja Ilidža, a to im iziskuje kako novčane troškove, tako i vremenske. Otvorenjem proširenog laboratorija u Ilijašu, građanima bi mnogo olakšali, posebno iz činjenice slabijeg zdravstvenog stanja ne moraju putovati na Ilidžu.

**Odgovor:** Inicijativa je upućena JU "Zavod za javno zdravstvo Kantona Sarajevo".

Po prijemu odgovora, isti će biti prezentiran Općinskom vijeću Ilijaš.

2. Podnosim inicijativu za postavljanje video nadzora u dječijim parkovima na području Općine Ilijaš.

Obrazloženje: Na području Općine Ilijaš nema mnogo sadržaja gdje bi naši najmlađi sugrađani mogli provoditi svoje slobodno vrijeme i družiti se sa vršnjacima, a i nekoliko postojećih parkova bude redovno uništeno od strane nesavjesnih građana. Postavljanjem video nadzora u parkovima, naša djeca bi bila sigurnija i sačuvali bi postojeći mobilijar.

**Odgovor:** Prihvatamo inicijativu. Nacrtom Budžeta općine Ilijaš planirana su sredstva za realizaciju navedene inicijative. Sredstva će biti realizovana u toku 2021. godine.

Pitanja:

Pitanje za JU "KSC i Radio Ilijaš"

3. Nakon okončanja postupka javnog otvaranja pristiglih ponuda po javnom pozivu za postavljanje 18 reklamnih mjesta na stubove javne rasvjete u svrhu promocije političkih subjekata za lokalne izbore 2020. godine, Komisija je konstatovala da je prvorangirani ponuđač odustao od ponude, te uputila prijedlog direktoru JU "KSC i Radio Ilijaš" da Ugovor o korištenju stubova zaključi sa drugorangiranim ponuđačem tj. Strankom demokratske akcije OO Ilijaš po cijeni od 212,00 KM bez PDV-a po jednom stubu.

Pitanje: Da li je Stranka demokratske akcije OO Ilijaš uplatila navedeni novčani iznos i kojeg datuma je izvršena uplata?

Molim vas da mi dostavite kopiju ugovora zaključenog između JU "KSC i Radio Ilijaš" i Stranke demokratske akcije OO Ilijaš, kao i bankovne izvode na kojima je vidljivo kojeg datuma i koji iznos je Stranka demokratske akcije uplatila po osnovu zaključenja ugovora.

**Odgovor:** Pitanje je upućeno JU "KULTURNO-SPORTSKI CENTAR I RADIO ILIJAŠ".

Po prijemu odgovora, isti će biti prezentiran Općinskom vijeću Ilijaš.

## **ANELA SUBAŠIĆ – vijećnica SDP-a**

Inicijativa:

2. Upućujem inicijativu za postavljanje otvorenog klizališta u vrijeme zimskih mjeseci u našoj lokalnoj zajednici. Predlažem postavljanje ledene plohe u decembru 2021. godine u centralnom dijelu općine.

Obrazloženje: Stanovnici općine Ilijaš, nažalost, nemaju dovoljno prostora za sportske i

rekreativne aktivnostu u vrijeme zimskog perioda. Iz tog razloga, mnogi roditelji svoju djecu vode na otvorena klizališta u sarajevske ili druge općine, dok drugi roditelji nemaju sredstava kako bi djeci priuštili radost klizanja vodeći ih na udaljenija mjesta. Klizalište bi znatno oživjelo svakodnevnicu svim građanima u Ilijašu, a pogotovo djeci i omladini. To bi bio jedan od načina da naši najmlađi sugrađani, ali i oni stariji, provode dane zimskog raspusta družeći se i uživanjem na ledenoj plohi. Osim toga, klizanje kao sport, sigurna sam da bi višestruko zadovoljio mališane po sportsko-rekreativnim, zdravstvenim, zabavnim i edukativnim (kod najmlađih klizača) osnovama. Moj prijedlog je da sada planiramo realizaciju ove ideje kako bi klizalište bilo otvoreno u decembru ove godine. Ukoliko podržite moju inicijativu, uvjerena sam da će se među mnogobrojnim posjetiteljima otvorenog klizališta naći i posjetioci iz susjednih općina.

**Odgovor:** Prema istraživanjima tržišta koje je u oktobru 2018.godine provodila JU "KULTURNO-SPORTSKI CENTAR I RADIO ILIJAŠ", troškovi iznajmljivanja ledene plohe površine 320m<sup>2</sup> (oko 50 klizača po terminu) za 20 dana iznosili bi oko 45.000,00KM sa uračunatim PDV-om.

Pored troškova iznajmljivanja potrebno je obezbijediti još dodatnih 5.000,00KM za troškove prijevoza, montaže, demontaže, korištenja viljuškara i dr.

Za realizaciju ove inicijative potrebno je obezbijediti 50.000,00KM. Ukoliko se u Budžetu općine za 2021.godinu obezbijede potrebna sredstva inicijativa će biti realizovana.

#### **ANEL BUMBULOVIĆ – vijećnik SDA**

Pitanje/inicijativa:

1. Na zahtjev mještana MZ Podlugovi postavljam pitanje i pokrećem inicijativu prema JU DZ Kantona Sarajevo.

Naime, mještani MZ Podlugovi obratili su mi se pitanjem i zahtjevom kada će se u ambulanti porodične medicine Podlugovi ponovo uspostaviti rad u drugoj smjeni, koji je obustavljen zbog pandemije Corona virusom.

U pomenutoj ambulanti Podlugovi se nalazi registrovano imeđu 6000-7000 zdravstvenih kartona (što po normative podrazumijeva tri ljekara). Građani navode da je ljekar koji radi u jednoj smjeni preopterećen, te da ne može na vrijeme i adekvatno odgovoriti na zahtjeve pacijenata za zdravstvenim uslugama. Građani takođe navode da oni građani koji su u radnom odnosu ne mogu ostvariti zdravstvene usluge u drugoj smjeni, te iste moraju ostvarivati u drugoj smjeni u centralnom objektu DZ Ilijaš ili uzimati slobodne dane sa svog radnog mjesta.

**Odgovor:** Pitanje je upućeno JU "Dom zdravlja Kantona Sarajevo"

Po prijemu odgovora, isti će biti prezentiran Općinskom vijeću Ilijaš.

#### **ALEN ARNAUTOVIĆ – vijećnik SDA**

Inicijativa:

2. Pokrećem inicijativu da općinski načelnik, putem nadležne službe i nadležnih u Kantonu Sarajevo, koordiniranom aktivnošću iznađu rješenje uspostave trajnog i sistemskog funkcionisanja Ambulante porodične medicine u punom radnom vremenu u Mrakovu.

Obrazloženje: Savjet MZ Mrakovo, u proteklom period od menadžmenta JU "Dom zdravlja" Kantona Sarajevo, tražio je uspostavljanje trajnog i sistemskog rješenja zdravstvene zaštite građana Mjesne zajednice Mrakovo, cijeneći statističke i demografske pokazatelje, gdje postoje optimalni uslovi za uspostavljanje kvalitetne zdravstvene zaštite građana barem od jednog tima doktora porodične medicine. Organi MZ Mrakovo čine stalne napore da motivišu građane govoreći im da su i oni djelimično odgovorni za trenutno stanje, ali ne gube nadu, jer postoje svi uslovi da se na ovom području ozbiljnije

razvijaju navedene usluge (posebno u prevenciji).

**Odgovor:** Pitanje je upućeno JU "Dom zdravlja Kantona Sarajevo"

Po prijemu odgovora, isti će biti prezentiran Općinskom vijeću Ilijaš.

Služba za društvene djelatnosti i poslove mjesnih zajednica u saradnji sa MZ Mrakovo i Domom zdravlja Ilijaš od 2014.godine vodi kontinuirane aktivnosti na uspostavi rada područne ambulante u Mrakovu. Suštinski problem je u činjenici da jedan tim porodične medicine dolazi na 1200 pacijenata, a da se za liječenje u ovoj ambulanti do sada opredijelilo oko 800 pacijenata.

#### **KENAN BUZA – vijećnik NIP-a**

Inicijative:

1. Pokrećem inicijativu da se postavi mobilijar za vježbanje na otvorenom u Mjesnim zajednicama Ilijaš Grad, Podlugovi, Stari Ilijaš, Misoča, te mobilijar za dječije igralište u Srednjem.

Obrazloženje: Primarni cilj ove inicijative je djeci i omladini sa područja navedenih mjesnih zajednica obezbjediti mogućnost za kvalitetno i sigurno korištenje slobodnog vremena. Podstaci ćemo djecu i mlade da se na ovim mjestima okupljaju, druže, te vježbaju i igraju.

**Odgovor:** Prihvatamo inicijativu ali sa značajno reduciranim obimom, obzirom na planirana sredstva u Nacrtu Budžeta općine Ilijaš za 2021.godinu.

*Služba za društvene djelatnosti i poslove mjesnih zajednica*